

DISSERTATIO MEDICA
INAUGURALIS

D E

S T I M U L I S.

Q U A M,

ANNUENTE SUMMO NUMINE,

Ex Auctoritate MAGNIFICI RECTORIS,

FRIDERICI BERNARDI ALBINI

A. L. M. PHIL. ET MED. DOCTORIS ANATOMÆ ET CHIRURGICÆ
IN ACAD. LUGD. BAT. PROFESSORIS ORDINARIJ

N E C N O N

Amplissimi SENATUS ACADEMICI *Consensu*, &
Nobilissimæ FACULTATIS MEDICÆ *Decreto*,

PRO GRADU DOCTORATUS

Summisque in MEDICINA Honoribus & Privilegiis, ritè ac
legitimè consequendis,

Eruditorum Examini submittit

SYLVESTER DOUGLAS, SCOTUS A. M.

Ad diem XXVIII. Martij MDCCLXVI. Hora Decima.



taque ista quoque naturæ rerum contemplatio, quamvis
non faciat medicum, aptiorem tamen medicinæ reddit.

C E L S.



LUGDUNI BATAVORUM,

pud THEODORUM HAAK, 1766.



Digitized by the Internet Archive
in 2019 with funding from
Wellcome Library


<https://archive.org/details/b30787750>

J U V E N I
N O B I L I S S I M O
ARCHIBALDO DOUGLAS
DE DOUGLAS;
GENTIS DOUGLASSIORUM,
LONGA HEROUM SERIE INSIGNIS,
P R I N C I P I;
INGENIO, MORIBUS, VIRTUTIBUSQUE,
MATER TERÆ VERE MAGNANIMÆ
CURAS EXIMIAS,
OPTIME JAM REPENDENTI;

Dissertationem Hancce


D. D. C. Q.

SYLVESTER DOUGLAS.



D E S T I M U L I S.



I. mnes motus qui in corpore humano cientur a vi STIMULI pendent; omnes actiones, cum vitales & naturales, tum pleræque animales huic, magna ex parte, debentur; nulla frequentior graviorque morborum causa; Quinetiam omnia fere medicamenta, quibus sanitatem amissam restituere conamur, qualitate stimulante pollent, cujus ope totos (a) effectus suos, vel saltem præcipuos producant. Multum igitur Medici interest ut stimulorum naturam, diversitatem, & effectus bene perspectos habeat, nec ingratum, inutilemve fore laborem spero, si quod de hoc argumento apud auctores legere est, in unum colligens, measque rationes, ubi ab iis dissentire cogor, candidè proferens, claro ordine ante lectoris oculos ponam.

2. Motus animalis instrumenta Musculi vocantur. Omnes musculi potestate sese decurtandi, vel suos fines pro-

(a) Vi forsan spasmodicà universa consistit medicamentorum actio.

LORRY de Melanch. T. I. p. 121.

propius ad se invicem adducendi induuntur, qua (*) officia sua peragunt. Hæc est Irritabilitas (b) HALLERI, Clari (c) GAUBII Vis vitalis, aliorum denique contractilitas musculorum. STIMULUS autem dicitur quodcunque talem actionem, vel, contractionem musculorum excitat (†).

3. Musculi omnes, etiam minimi, (d) nervos accipiunt, semperque his sectis, vel ligatis, (e) paralyti afficiuntur, aut si iis, etiam ex corpore resectis, stimulum applices, eadem prorsus sequitur musculorum contractio, ac si ipsas fibras musculosas (f) irritavisses. Hinc, ni fallor, clare patet musculos, perduto nervorum adjuvamento, irritabilitatem pari fere passu amittere, (g) adeoque nullam veram differentiam esse inter eorum vim insitam & nervosam, licet varia argumenta in medium profert Ill. HALLERUS ad hanc differentiam stabilendam (h).

4. Sed quia nervi ad musculorum actionem necessarii
sint

(*) De contractione musculorum mortuâ vel naturali, vocatâ, non loquor, quia musculis cum omnibus aliis corporis partibus communis est, nisi nervos excipias, nec igitur vera actio muscularis ei tribuenda est.

(b) Confer ejus Opera diversa.

(c) Pathol. Ed. I. p. 72. No. 170.

(†) Irritamentum vocat GAUBIUS, Ed. I. loc. cit. No. 171.

(d) HALL. El. Phys. T. IV. p. 424.

(e) HALL. f. c. p. 323. ALB. Histor. Musc. p. 19. KAAU Impet. Fac. No. 288. WHYTTE Ess. on vit. Mot. Ed. II. p. 12.

(f) HALL. loc. cit. p. 322.

(g) Vide WHYTTE Phys. Ess. Ed. II. p. 250.

(h) l. c. p. 467. 468.

sint, non ideo irritabilitas ab his solis pendet, (*i*) aliæ enim corporis partes, quæ nervos numerosos possident, vi irritabili haud fruuntur, quæ proculdubio fabricæ ipsius fibris musculosis propriæ potissimum debetur (*).

5. Multum apud Physiologos disputatur, de modo quo stimuli in musculos vel eorum nervos agunt (*k*), sed nil certi, a viris doctis qui de hac re scripsere, ad eam elucidandam profertur. Clarus, Præceptor olim noster, WHYTT multo ingenio & subtilitate insudat ut irritabilitatem deducat (*l*) a sensibilitate. Stimulus nempe, ut ei videtur, sensationem ingratam excitat in musculo cui applicatur, quæ a nervis ad mentem vehitur; illa autem iisdem ministris usa, sua mandata ad musculum irritatum transmittit, qui se contrahendo noxam depellere molitur. Sed hæc Theoria, ob difficultates alias quas-cunque comitantes (*m*) fabricata, ipsa difficultatibus premitur vix superandis. Ponet enim sensationem sine animi, etiam attenti conscientiæ, & hujus actionem in muscu-

(*i*) Ut credidisse videtur KAAU. „Vis illa qua partes solidas movemus omnis fiat ope nervorum unicè.” Impet. Fac. C. V. No. 180.

(*) Quid nervi, (vel secundum eum, spiritus Animales) conferunt, optime, meo judicio, exprimit GLISSONIUS „Sine his igitur ipsa organa „ad sua munia obeunda vix satis idonea esse possunt. Nihilominus ipsas actiones immediatè edere non videntur, sed tantum partes ad „agendum habiles, & paratas actu constituere”. Postea theoriâ spirituum animalium abripitur. De Ventr. &c. Ed. Amst. 1677. p. 188.

(*k*) Vide BELLINI de stimulis, Opusc. Prop. L. p. 229. BAGLIVI de Fibra motrice specimen. Lib. I. Cap. XI. SANTORINIUS de struct. ac motu fibræ N. LXXXII. ad finem.

(*l*) Essay on Vital and other involuntary motions, passim.

(*m*) Essay in Præf. & pag. 255. ad 269.

musculos de corpore exsectos (*n*), quæ haud concipere possumus.

6. Varias porro Hypotheses, varia figmenta excogitavere auctores diversi, de mutatione quam fibræ ipsæ musculosæ subeunt, dum agunt & breviores fiunt. A meo proposito valde aberrem, si omnia eorum placita enumerare aggrediar; fatis sit, illam doctrinam leviter perstringere, quæ sub diversis formis, plurimis inter Physiologos recentiores, BORRELLO (*o*) scilicet, BELLINO (*p*) KEILIO (*q*), BERNOUILLIO (*r*), magnoque, ut alios omittam, BOERHAVIO (*s*), arrisit.

7. Nempe docuere fibras ultimas musculares, vel omnino cavas esse, vel ex serie vesicularum, aut cellularum conflatas, quæ, musculo laxo manente, vacuæ in filas quasi longas extenduntur, sed quandocunque musculi agere incipiunt, has cellulas distensas vel inflatas, ponunt, nescio quo fluido nerveo, liquore effervescente, vel aëre elastico, tali modo, ut sphaerulas numerosas jam forment, unde fibrarum longitudo tantum minuitur, quantum musculi agentes reverâ contrahuntur.

8. Nullus vero Anatomicus has cavitates vel cellulas fibræ ultimæ musculosæ aut vidit unquam, aut propter fibræ exiguitatem potest videre. ANTONIUS LEEUENHOEK ipse nusquam fibras cavas vel vesiculosas depinxit, quamquam

(*n*). Objectionibus hinc derivatis obviam ire conatus est Cl. Auctor p. 385. Ed. I. ad finem libri, & Physiol. Ess. Ed. II. p. 158, 159.

(*o*) De Motu Anim. prop. 113. 114. 117.

(*p*) Ad. Lector. de mot. musc. No. 15.

(*q*) Anat. compend. Ed. XIII. p. 112. 113.

(*r*) Mot. musc. N. 2. 5. 6.

(*s*) Instit. rei med. No. 395. 402. T. 404.

quam acuta oculorum ejus acies ad naturæ minutias explorandas perquam idonea fuit; quid quod & si hanc structuram musculis concedas, Hypothesis ista, Phænomena contractionis muscularis haudquaquam solvit. Si fibra ex lineari gracilitate in sphæram perfectam attolleretur, tertiam partem solummodo suæ longitudinis amitteret, dum interim spatium majus quam antea occuparet: At certe plures muscoli quando contrahuntur dimidio breviores evadunt, ut in musculis orbicularibus, cavis, & spincteribus facile foret demonstrare, & ex experimentis apparet (t) musculorum agentium molem diminutam potius quam auctam esse.

9. Missis igitur his eruditorum insomniis, ad argumentum nostrum propius accedamus, quod sub quatuor capitibus digerendum censeo: considerare enim oportet,

1°. Quomodo stimuli naturâ vel effectibus inter se ipsos discrepant; 2°. Quinam sunt eorum usus in corpore sano; 3°. Quo pacto, quatenus morborum causæ, sanitatem delent. 4°. Denique, qua ratione eam, quatenus medicamenta, restituunt.

(t) GLISSONII, SWAMMERD. & GODDARDI. Fateor multas objectiones inventas esse his experimentis.



§. I.

DE STIMULORUM NATURA
ET DIVERSITATE.

10. Stimulus, secundum definitionem jam (2) traditam, est quicquid in muscutorum irritabilitatem agens, eorum contractionem excitat (*u*): Excitatur vero causis in ipsas fibras muscutorum agentibus, vel in nervos ad muscolum aliquem pertinentes (*v*), vel in omnium nervorum originem, encephalon (*w*) scilicet, & medullam spinalem (*x*), vel demum in alios nervos diffitos mediante cerebro (*y*).

11. Si nunc modo dicta (10) cum diversis vitæ motûsque animalis phænomenis conferantur, quanta sit stimulorum varietas facile patebit; verum enim vero tres
claf-

(*u*) Stimulus sæpe sensu laxiore usurpatur pro omnibus tam sensibilitatem quam irritabilitatem afficientibus.

(*v*) HALL. loc. cit. p. 322.

(*w*) Id. ib. p. 325.

(*x*) 1327.

(*y*) p. 334. & seqq. Stimulos ad nervos applicatos, effectus sympathicos in alios nervos musculosve edere, interventu communis nervorum originis, vel Aistheterii, ut amat vocare Kaauwius, (non, ut vulgo credebatur, connexu horum nervorum) proposuit ille, (Impet. Fac. cap. V. No. 197.), alii adoptavere, ultra dubium autem ponit WHITT in initio libri sui anno superiore editi, de Morbis nervosis, nec non Professor alius Edinensis AL. MONRO filius in prælect. Anatom.

claffes fequentes eos omnes complectuntur: funt namque omnes Chemici, Mechanici, vel qui a mente pendent, quibus nomen Mentalium imponere licet.

12. Stimuli Chemici agunt in mufculos, nervos, cerebrum (10) qualitate quadam peculiari, fibique propriâ, quam chemicam nuncupamus, acore nempe, falfedine, vel aliâ quavis acritudine, & in his nihil faciunt, eorum figura gravitas, durities &c. Si alkali volatile mufculo applices, formâ acutâ, obtufâ, angulatâ, rotunda, perinde eft, eum femper in contractionem follicitat. Idem verum eft de acidis, falibus neutris & metallicis, alcohole, omnibusque id genus ftimulis.

13. Stimuli Mechanici, è contrario, funt hi omnes qui agunt qualitatibus mechanicis, quas corpora omnia communes habent. Ita quodcunque corpus figurâ fuâ acutâ mufculos vulnerat, obtusâ comprimit, diftrahit gravitate, vel duritie conterit, fit fal, fit oleum fit metallum, fit terra, ftimulus eft mechanicus. Quando mufculum acu pungo, fcindo scalpello, ubi cavum mufculum aëre, aquâ, fangine diftendo, hæc omnia ejus contractionem ftimulo fuo mechanico efficiunt.

14. Facile eft videre quod hæc duo ftimulorum genera poffint ita conjungi, ut idem corpus ftimulo tum chemicô, tum mechanico agat. Exempli gratia fi diftendatur mufculus aliquis cavus, injiciendo in ejus alveum, acidum vel cujusvis aliûs falis folutionem, eum ftimulus irritabit ex acrimoniâ, & diftentione compositus; & fane hujusmodi ftimuli corpori humano naturales inveniuntur, multo tamen rarius, ut nobis equidem videtur, & demonftrare poftea tentabimus, quam vulgo apud Phyfiologiæ fcriptores docetur.

15. Hic

15. Hic forsitan non inutile erit observare, stimulos mechanicos magis idoneos esse, quam chemicos, ad experimenta circa irritabilitatem facienda, ut propriâ, aliorumque (2) experienciâ edidici; iis enim magis accuratè uti possumus, meliusque ad unum punctum eos applicare, nec musculi texturam, ut plerique chemici, destruunt.

16. De tertia stimulorum classe, quos Mentales (11) appellavimus, necesse est ut paulum fusius differamus, vitantes quam maximè obscuritatem, tenebrasque quibus omnia quæ ad mentis cum corpore, nexum, & eorum mutuas in se invicem actiones pertinent, semper fere obumbrantur.

17. Quando eventum aliquem alium semper immediate sequi experienciâ discimus, ita ut nullum alium, qui primum inter & alterum intervenit, indagare possimus, primum illum pro effectû, alterum pro causâ habemus; & si quis rem rectè ponderet, videbit sanè hanc solam causæ notiouem esse, quæ unquam in animo nostro formatur, namque vis insita, quâ ex necessitate fit ut causa aliqua effectum suum producat, nobis prorsus (*) ignota est, & fortè manebit, nisi novas mentis facultates adipiscamur. Uthancrem exemplo illustrem,

(2) HALL. El. Ph. T. IV. p. 322. Confer. ejus exper. cum Zimm. Felic. &c.

(*) Nonnulli propter nostram ignorantiam circa causarum intimam naturam & efficaciam, hac voce in Philosophiam fere omnino rejectâ, Eventuum successiones constantes, Leges Naturæ appellare malunt, (Reid's Enquiry into the human mind. Ed. II: p. 54. 88. 89.) Nec sine ratione; sed sensu quo hoc verbum utor, clare patente, præstantiùs judico solitam loquendi formam hîc usurpare.

strem, si instrumentum acutum, modo peculiari, corpori cuivis molli applicetur, corpus hocce statim in duas partes dividitur. Hinc applicatio Instrumenti acuti ad corpus molle causa dicitur ejus divisionis. Qua propter? Quia talem applicationem semper similis sequitur eventus. Nemo novit instrumenti vim insitam quâ partes corporis mollis a se invicem separantur.

18. Si vero certi mentis affectus, cogitationes, pathemata, & sic porro, mutationes certas in corpore semper habeant pedissequas, harum causæ profectò existimandæ sunt; &, ut hæc ratiocinatio melius nostro argumento accomodetur, quando pathema, vel alius animi affectus, actione cordis, vel musculi cujusvis comitatur, minime dubitandum est, quin sit hujus actionis causa, vel, quod idem audit, talis musculi stimulus.

19 Fateor equidem plurimos credere eventum alium, inter talem mentis affectum, & musculi contractionem occurrere (a), qui affectionis animi effectus, causa vero contractionis musculi haberi debet. Contendunt nempe mentem nervos mutare, illos autem musculos; nec huic sententiæ omnimodo contradicerem, quum mens non in musculos agat, postquam nervorum ad eos pertinentium communicatio cum communi nervorum origine intercluditur: sed quia ista nervorum mutatio sub oculis haud ponatur, & sane naturâ suâ incerta sit & incomprehensibilis, mihi potius videtur ejus considerationem rejicere, exemplo magni Philosophiæ Naturalis principis

(a) „Animi affectiones agunt modo in impetum” KAAU. Imp. Fac. cap. III. No. 112.

pis NEUTONI, qui interventum Ætheris inter corpora se adtrahentia suspicatus est, hanc vero opinionem ad conjecturas modestè ablegavit, corporaque ipsa quasi in se immediatè agentia consideravit.

20. His (17, 18, 19.) præmissis, magnum esse numerum, latumque imperium stimulorum mentalium inveniemus. Omnes tamen ad quatuor classes pertinere videntur, sensationes nempe, appetitus, pathemata & voluntatem.

21. α . SENSATIONES variæ musculos in actionem sollicitant. Sic dolor inter stimulos vulgatissimos habendus est; Titillatus (*b*) omnes fere musculos artuum sese contrahere cogit; strepitûs (*c*) insoliti auditus mulieres quasdam in convulsiones conjicit; multæque denuo sensationes singulares, in iis qui peculiari idiosyncrasiâ præditi sunt (*d*), vice stimulorum funguntur.

22. β . Nec minus in promptu sunt exempla virtutis APPETITIVUM stimulatricis. Si homini esurienti cibum offeras, vel modo ejus mentionem facias, saliva, copiâ magnopere aucta, pleno quasi rivo fluit in os. Qua de causâ? Quia novus præbetur stimulus vasis glandularum quæ hunc liquorem secernunt. Quod si objiciatur, hominem antea esurgentem, non idcirco salivæ fluxum expertum esse, respondeo, quod quamvis cibi refocillatione semper indigeat esurientium corpus, eos non idcirco cibum semper appetere (*e*), multa alia animo interim versantes.

23. Ap

(*b*) GLISSON l. c. p. 197.

(*c*) LORRY, l. c. p. 62. & alibi.

(*d*) Vide Infra, No. 36. not.

(*e*) Confusio quædam hîc oritur, quia FAMES pro inedia & ciborum appetentiâ indiscriminatim usurpatur.

23. Appetitus Venereus causa est quâ penis erigitur, vel stimulus musculorum, qualescunque sint, quibus hæc actio perficitur, nec dubitandum est quin partes musculosas pudendorum in mulieribus quoque in actionem ciet, vel etiam convulsivos aliorum musculorum motus (*f*) in feminis tenellis producat.

24. γ. Omnia PATHEMATATA (*g*) [mentis, ad gradum quendam evecta, fiunt stimuli. Nullum esse judico, cui hujus rei exemplum in seipso non contigit observare. Quis enim, dum mens gaudio vel spe magnâ impletur, cor sæpius & violentius agens non sentit? Quis paulo iracundior, non expertus est, quando irâ pectus laborat, omnes musculos suos levi quadam tremore, a convulsione non longè distante agitados? Mæstitiam effusio lachrymarum; genarum rubor, pudorem sequuntur; hac nempe vasa genarum, illâ, glandularum lachrymalium vasa stimulantur.

25 Sed magis conspicui sunt effectus pathematûm in sexu teneriori; namque puellæ, hæ præsertim, quæ temperamentum delicatius ex parentibus nactæ, id jam magis irritabile vitæ genere reddidere, a pathemate aliquo violentiore in convulsiones canalis alimentarii (*b*), vel sæpe etiam totius corporis rapiuntur.

26. Quando stimulus quivis, ad ordines tres jam memoratas pertinens, musculorum actionem ciet, mens omnino inconscia est hujus actionis, saltem nisi fortuito ex effectibus appareat.

27.

(*f*) LORRY loc. cit. p. 19.

(*g*) Confer. GAUB. Pathol. Ed. I. No. 532. ad 544.

(*b*) SYDENH. Dissert. Epist.

27. 8. VOLUNTATIS jussa inter stimulos a mente pendentes (20) haud immeritò numeravi, quamvis vulgo a stimulis (*i*) separata, pro diverso admodum genere causarum in musculos agentium habentur. Luculenter certe mihi apparet nullum discrimen posse hæc inter, & alios stimulos mentales monstrari. Expendamus quæ fiunt quando muscoli voluntarii dicti a voluntatis nisu contrahuntur. Ubi e. g. cubitum flectere volo, flectitur, hæc flexio autem perficitur muscoli bicipitis contractione; sed voluntatis nisus ad finem tantum dirigitur, instrumentum haudquaquam respicit, nam bicipitem se contrahere nec jubeo, nec contractum esse novi, nisi forsan ex Anatomicis; & rusticus certe, quid sit musculus profecto nesciens, artus sæpe movere queat melius quam humani corporis professor expertissimus.

28. Quod si voluntas ad instrumenta motûs non dirigatur, ejus nisus ad artum aliquem movendum, vel alium quemcunque motum perficiendum, ut stimulus (*k*) alius quivis mentalis solummodo agit in musculos huic usui a naturâ dicatos; similiter nempe ac pathema quodvis cordis actionem auget, mente de eo minime (26) cogitante. Patet evidenter rem multo aliter se habere, quam si mens norat quales muscoli ad motum aliquem perficiendum idonei sint, eosque, ex hac notitiâ electos, se contrahere juberet. Si igitur certi muscoli, voluntarii dici merentur, quia nisu voluntatis stimulantur, mo-

(*i*) WHYTT Vital. Mot. p. 18. p. 255. „This cause” (viz. which excites muscular contraction) „is either an effort of the will or a stimulus”.

(*k*) SIMSON on musc. mot. p. 93.

motus tamen quos edunt multo proprius voluntarios nuncupamus, quum ad illos nisum voluntatis dirigat mens.

29. Sed præter motus vulgo voluntarios appellatos, qui a voluntate, modo jam exposito (28), immediate pendent, omnes fere alii a cæteris stimulis mentalibus oriundi, in ejus potestatem nonnumquam veniunt: Nam si experiëntiâ repetitâ noverimus affectus illos animi qui hujusmodi motuum sunt causæ, & eos ad libitum revocare possimus, quod sæpe fit, tales motus quoque ad libitum possunt revocari. Sic ubi didici, pathernate quodam actionem cordis augere, effectum eundem quando volo producere possum. Idem dictum sit de sensationibus & appetitionibus, quæ plura quoque hujus rei exhibent exempla.

30. Hinc apparet morbos convulsivos a mendicantibus, ad misericordiam provocandam, in seipsis excitatos, non idcirco simulatos esse, mentis solum affectiones experiëntiâ illi discunt, quæ similes convulsiones antea in se efficere; motus enim tam miros artuum in his casibus observamus, ut nemo adeo agilis est qui eos simulare queat. Nec dubitandum est quin simili modo feminae nobiliores (1), ut maritum vexent, vel alias ob causas se in veros hysteriæ paroxysmos nonnumquam conjiciant.

31. Est genus stimulorum mentalium, quod cui ordini referendum sit prorsus dubito. Nonnulli, systemate muscifero nimis irritabili præditi, ubi aliquem motibus convulsivis agitatum vident, simili statim afficiuntur modo.

Osci-

(1) HALLER El. Ph. T. IV. p. 521. LORRY de Mel. l. c. p. 37.

Oscitatio, vomitusque (*m*) hujus convulsivæ quasi contagionis exempla præbent decantata; nec raro evenit ut feminae, in hysteriam alioquin pronæ, ejus paroxysmum illico subeant, si aliâ, hoc morbo laboranti, casû occurrant.

32. Sed & morbos convulsivos (†) magis raros & portentosos hoc modo propagatos fuisse docet historia; & talis certe in Augusta Scotiæ provinciâ annis duobus superioribus increbuit, quem feminas, præsertim rusticas, adorientem, plures medici, alique testes idonei videre. Harum una, hieme præteritâ in Nosocomio Regio Edinensium admissa, mihi quoque occasionem præbuit symptomata observandi. Fuere autem paroxysmi, motibus artuum insolitis & miris constantes, qui sæpius in dies rediere, multis aliis affectibus, huic morborum classi communibus, prægressis, comitantibus, & sequentibus. Mens interim integra mansit, perdurante etiam paroxysmo (*). Hujus morbi nulla causa reperta est, nisi mulierum jam eo laborantium conspectus, ægrotarum enim pleræque ex aliarum similiter ægrotantium visu, illæ antea sanitate, correptæ fuere.

33. An in his casibus horror vel timor, stimuli nempe qui ad pathemata pertinent, causa sit cur spectantes afficiantur? Annon aliquando sensatio ipsa oculis impres-

sa.

(*m*) LORRY ibidem p. 64. GLISS. De Vent. &c. Ed. Amst. An. 1677. p. 197.

(†) LORRY l. c.

(*) Similia fere in Amænit. Acad. sub RAPHANIÆ nomine descripta invenio; causa vero cui Raphania tribuitur à nostro morbo absuit.

fa, ut in oscitatione, ubi nullum horrorem experimur, pro stimulo habenda sit?

34. HACTENUS de stimulis, eorumque diversâ naturâ, in seipsis spectatis differuimus (10 ad 33), sed differentias haud minores inveniemus, si varios quos edunt effectus contemplemur. De his igitur jam dicere pergitur.

35. Plures stimuli in omnes musculosas corporis partes indiscriminatim agunt; alii certos tantummodo musculos afficiunt, nec ullâ potestate fruuntur cæteros irritandi (+). Ex hac differentiâ sequitur stimulorum divisio in duas classes generales. In Universales, scilicet, & Specificos. Salia acida & alkalina in omnes musculos agunt; sunt itaque universales: E contrario aqua vel quivis liquor mitis glottidi applicati, ejus strictionem illico producant (n), tubum intestinale autem minime exstimulant, nec alios quoscunque musculos. Quare hi sunt glottidis stimuli specifici. Non aliud hujusmodi stimuli exemplum notabilius est quam radix Ipecacuanhæ, quæ etiam in venas injecta, & cum sanguine per totum corpus circumvecta, nullius musculi, nisi ventriculi convulsiones excitat, eum vero se contrahere, & quæ continet vomitione expellere cogit, non secus ac si huic vîsceri directè applicata fuisset.

36. Generatim, stimuli mechanici, nullo excepto, ad universales pertinet; chemici medium locum obtinent, inter illos enim multi universales inveniuntur, non-

(+) WHYTT Vit. Mot. p. 32. HALL. El. Ph. T. IV. p. 466. 575, 576.

(n) WHYTT. ibidem p. 232.

nonnulli specifici, quorum exempla plurima inter medicamenta occurrunt; appetitus, & pathemata mediocriter excitata, ad específicos referre debemus, & si rem subtiliùs scrutemur, videbimus singulos voluntatis nifi pro stimulis specificis musculorum, motui desiderato inservientium, habendos esse; pathemata denuo violentiora, & sensationes, (nonnullis, in homines peculiaris idiosynerasiæ (21) agentibus (*) exceptis) sunt universales.

37. Stimulorum alii agunt præsertim in partes quibus directè applicantur; alii ad-musculos remotos, vel etiam per totum corpus, effectus suos communicant. Horum primi Topici, alteri Mobiles vel Diffusiles nominari possunt.

31. Ut hanc stimulorum divisionem exemplis enucleamus, si acidum quodcunque forte, alicui corporis parti applicetur, ruborem ibi statim excitabit, auctâ vasorum partis actione, vi ejus stimulante; at si huic loco (colum putamus) salis ammoniaci spiritum imponas, eum, gradu multò leviori rubere faciet, attamen cito omne systema vasculosum ita afficiet, ut sudor per totam superficiem corporis fuerit eliminatus.

39. Experientia conjecturam suppeditare videtur, quod corpora pleraque volatilia apud stimulos diffusiles locum tenent, ut sal alkalinum volatile, alcohol, æther, olea essentialia &c. dum fixa ad topicos potius sint referenda:

(*) Harum multa exempla apud auctores passim leguntur. Vulgatissimum est illud de viro, qui tibiæ utricularis sonum audire nequivit, quin statim miçturiret. HALLERUS narrat de Michael le Vayer, quod illi semper similis urinæ fluxus fiebat ex manuum lavatione.

da: e. g. salia acida, alkali fixum &c. Theoriam hujus rei, cui exceptiones aliquas prævideo, aliis exstruere relinquo.

40. Musculi plerumque, quum a vi stimuli se contrahunt, cito post, pristinam longitudinem recuperant, vel uti loqui mos est, relaxantur; & stimulo fortiori (†) applicato, vel post primam contractionem non remoto, alternis agitantur motibus: Aliquando autem contracti manent, per satis longum temporis spatium. Hujusmodi fixæ contractionis exempla pauca, in corpore sano, plura inter morborum symptomata, nomine spasmodorum, occurrunt.

41. Ista phænomenorum diversitas, non ex aliquâ stimulorum differentiâ pendere videtur, idem enim stimulus, in diversis casibus, contractionem nunc fixam, nunc alternam producit. Unde oritur, omnino ignoro; ejus causa finalis, in exemplis saltem, quæ in sanitate observantur, haud incerta videtur, nam quando musculi fixam contractionem subeunt, hoc modo fini desideratæ meliùs inserviunt, (o) & vice versa.

(†) WHYTT. l. c. p. 92.

(o) WHYTT. l. c. p. 286. & seqq.



§. II.

DE STIMULORUM IMPERIO IN
CORPORIS SANI FUNC-
TIONES.

42 Corpus humanum, hinc & illinc magnopere mutari potest, illibatâ interim sanitate. Pulsus, circulationi signum, nunc tardus, nunc citatior, hodie fortis, cras debilior invenitur; Alvus strictus sæpe, sæpe laxus evadit; secretiones omnes variè minuuntur, vel augentur & omnes denique functiones, diversis temporibus, diverso gradu exercentur. Stimuli igitur varii, corpori forinsecûs applicati, vel in mente orti, illud fortuito omni fere horâ afficiunt, nec sanitatem lædunt nisi violentiores sint, vel per nimis longum temporis spatium agere pergant. Hi, ex abusu sex rerum nonnaturalium (uti vocantur) præcipuè proveniunt, & casu tantum agentes, nullis officiis, vitæ necessariis, funguntur.

43. Sunt alii vero sine quibus corporis functiones omnimodo cessarent, & qui ideo in eo semper præsentibus, Naturales vocari merentur.

44. Functionis cujuscunque instrumentum, naturâ musculosâ præditum, munere suo, sine stimuli ope performere nequit (2, 10.). Sed prorsus inter se litigant auctores de organis quæ tali naturâ musculosâ gaudent unde fit, ut stimulorum naturalium imperium inter cer

tas limites adhuc non circumscribatur; quare operæ præ-
tium erit, eorum præcipua seorsim scrutare, ut verita-
tem propius attingamus, conantes, dum progrediamur,
classẽm deprehendere, cui singuli stimulorum naturalium
pertinent.

45. De motus (*p*) voluntarii organis, utpote quæ nihil
incerti, vel in naturâ suâ, vel in stimulis suis naturalibus
(27) habent, non est cur aliquid hîc loci diceretur. His
igitur prætermiſſis, ordine sequente, partes præcipuas,
actiones naturales & vitales peragentes, tractare insti-
tuimus. Tubum, nempe, intestinale; Vasa lactea,
totumque systema absorbens; Cor, & Vasa sanguifera;
Musculos, quibus respiratio perficitur; Glandulas, cum
ductibus suis; postremo partes Generationi vel Partui in-
servientes.

46. TUBUS INTESTINALIS cavus est musculus, parti-
bus tribus distinctis constans, stomacho, nempe, ven-
triculo, & intestinis, quæ iterum in tenuia & crassa di-
viduntur.

47. „Linguam, ad radices ejus hærens, excipit sto-
„machus, quo primum illabuntur alimenta quæ ab ore
„accepta sunt; atque is, agitatione & motibus linguæ
„quum depulsum & quasi detrusum cibum accipit, de-
„pellit; ipsius autem partes eæ quæ sunt infra id quod
„devoratur, dilatantur, quæ autem supra contra-
„hantur (*q*)”, usque donec ad ventriculum perven-
tum sit.

48.

(*p*) Motus intelligo omnium consensû voluntarios dictos, nam
de respiratione, quam infra (78. &c.) tractamus, dubitatur.

(*q*) Verbis Ciceronis utor.

48. Ista stomachi actio, prorsus (*r*) muscularis, aliquantisper situ ejus perpendiculari, in corpore humano, adjuvatur; auxilium autem hinc derivatum omnino fortuitum est, nam sæpe in aliis animalibus, stomacho ventriculus altior jacet, & nos quoque etiam proni jacentes cibum facilè depellimus; ne illos memorem qui, lucri causâ, liquorem aliquem sorbeunt, quando pedibus in aëre elevatis, corporeque manibus fulto, iter ex ore in ventriculum penitûs invertitur.

49. Ex illâ stomachi contractione (47) cibum descendente gradatim sequente, enucleatè apparet, eum in (*s*) actionem cibo ipso stimulari. Alimenta pleraque nostra, indolis blandæ, mitis (*t*), & insulsæ, stimulo mechanico solummodo agere possent, Stomachum nempe distendendo, (*u*) sed quia cum variis acribus ut plurimum arte culinariâ condiuntur, stimulum quoque chemicum ab his mutuuntur. Stimulus igitur gulæ naturalis est distensio, cui plerumque se comitem dat acrimonia.

50. Cibus in ventriculum delatus, ibi per satis longum temporis spatium retinetur, quo tempore mutationis notabiles subit, quæ quales sint, vel quomodo efficiuntur, nec adhuc definitur, nec nostrî, in præsentis, interest, quum in humano corpore, non multum certè a vi (*v*) musculofo pendeant. His autem peractis, ventriculus
fu-

(*r*) GLISSON de Ventr. &c. p. 300.

(*s*) WHYTT. l. c. p. 98.

(*t*) GAUB. Path. Ed. citat. No. 296. pag. 138.

(*u*) Forsan pressurâ solâ stimulatür stomachus quum bolus parvus devoratur, at certe multo facilius est bolum qui stomachum distendit devorare.

(*v*) HALL. Pr. Lin. Phys. N. DCXXXIV.

superiùs astrictus, dum inferiùs relaxatur, cibum trans pylorum, in intestina tenuia propellit.

51. Dum alimenta in ventriculo digeruntur, aër ille fixus, quem, illa, prout omnia alia (x) corpora, continebant, liberatus, & cum aëre atmosphærico, a cibis in ore irretito, unâ conjunctus, sensim expanditur, donec ejus fibras ita distendit, ut stimuli mechanici vice fungatur: Hujus actionem adjuvat acrimonia (y) ciborum, quam vel pristinam retinent, vel novam fortiuntur. Itaque naturalis vis stimulatix, quâ ventriculi contractio cietur, non dissimilis est illius, quam in (49) stomacho invenimus.

52. Prope intestinorum tenuium initium, novus accedit stimulus: Bilis scilicet, liquor amarus, ex ductu suo in duodeno stillans, alimentis admiscetur cujus acritudine juvantur stimuli quos in ventriculo (51) notavimus, ad excitandam in intestinis contractionem (z), quâ ciborum reliquæ, a vasis lacteis rejectæ, anum versus, promoventur. Hæc contractio, actioni stomachi (49) admodum similis, nomen proprium motûs peristaltici vel vermicularis adepta est.

53. Ubi ad intestina crassa perventum est, nihil nisi ciborum fordes jam restat, quæ magis magisque accumulatae, mole suâ distensionem producant, &, in putredinem vergentes, stimulo chemico quoque in fibras musculosas agunt. Stimulo hoc (14) composito, extrema intestina si-

(x) Vid. HALE'S Veg. Staticks Mc. BRIDE'S Essays.

(y) WHYTT. l. c. p. 96. & seq.

(z) Id. Ib. p. 100. & seq. HALL. Pr. lin. Ph.

militer ac cætera, in contractionem cientur. At, ne hæc contractio, omni temporis puncto agens, fæces assidue expellere pergeret, anus musculo circulari cingitur, cujus actione, quæ a voluntate (a) pendet, occlusus teneatur, usque dum alvi exonerandi desiderium oritur. Tunc, aperto hoc orificio, ejiciuntur excrementa, vi unitâ intestinorum, diaphragmatis, & musculorum abdominalium, qui, in hunc finem, voluntatis nisu contrahuntur: Nec tamen absolutè necessarii sunt musculi hi voluntarii ad fœcûm excretionem, sæpius enim in vivorum animalium sectione, postquam musculi abdominis cultro anatomico jam divisi fuere, excrementa pedetentim expulsa observavi; quinnimo, quando sphincter a lue venerea integrè eroditur, miseri ægroti facultatem fœcum retinendi prorsus amittant, quum sanè diaphragmate vel musculis abdominalibus indefinenter minimè utuntur.

54. Ut cibi reliquiæ vi musculosâ & stimulorum ope, ex corpore (52, 53.) detruduntur, ita ejus pars nutritia, ex intestinis in sanguinem, simili vehuntur modo. VASA nempe LACTEA dicta, in cavitate intestinorum, præsertim tenuium, apertis osculis hiantia, chylum jam elaboratum hauriunt, qui, naturâ suâ admodum mitis, vasa ista distendit, & stimulo mechanico in contractionem urget, unde versus ductum thoracicum movetur.

55. Hîc quoque lymphæ appellit, quæ, per totum fere corpus, vasis aliis, eidem (b) systemati pertinentibus,

(a) Ejus actio verè muscularis (2. not. *) voluntate certè excitatur, scilicet quum fæces, in recto coacervatæ, hoc intestinum fortitur exstimulant, & tamen eas retinere oportet.

(b) Vasa Lymphatica, non ex arteriis oriri, sed systema omnimodo diversum constituere, quod lympham, ubicunque in corpore effun-

bus reſorpta, & ſtimulo mechanico diſtenſionis iter ſuum ſimiliter promovens, cum chylo, in ductu thoracico miſcetur. Liquores vero hi duo canalem iſtam iterum mechanicè exſtimulant, donec ab ejus contractione propulſi, cum ſanguinis flumine, in venâ ſubclaviâ ſiniſtrâ junguntur.

56. Rem ita ſe habere (c) nemo eſt qui dubitat, quum HALLERUS ipſe, irritabilitatem vaſorum ſanguinem vehentium ſtrenuè negans, vaſis abſorbentibus vim muſcularem concedat, (quippe qui contractionem ductûs thoracici, & vaſorum lymphaticorum hepatis, ex ſtimuli chemici actione, (d) expertus ſit), & omnes in vivis animalibus ſecandis verſati, frequentur viderunt chylum album his vaſis ſub oculis expulſum, ita ut, ad minorem diametrum redacta, & liquore colorante privata, prorſus evanuerit. Ex dictis vero apparet diſtenſionem eſſe ſtimulum naturalem omnium vaſorum abſorbentium (54, 55.)

57. CORDIS actionem contemplari jam aggredimur, cui fas nobis ſit aliquantum diutius immorari, quum ſit viſcus quod, præter pleraque alia, medicorum attentionem ſemper meruit, mereturque, propter nobile quo in corpore animali fungitur officium.

38. Cor vocamus, muſculum ex quatuor caveis conflatum, qui ſanguinem ex venis cavis & pulmonalibus accep-

funditur, abſorbet, Inventum eſt hujus ſeculi, quo nihil in Anatomicis, poſt detectum ſanguinis circuitum, pulchrius habet *Brittannia* noſtra quo gloriatur.

(c) WHYTT. Phyſ. Eſſays Ed. II. p. 78.

(d) El. Phyſ. T. I. p. 165.

ceptum, in maximas arterias expellit; & in hunc finem vicissim dilatatus, & astrictus, numquam, dum vita superfit, per longum temporis spatium quiescit. Phænomena ejus actionis sunt perquam simplicia. Influxu sanguinis ejus caveæ dilatantur, vel diastolen subeunt; posthac istæ caveæ se contrahunt, & sanguinem iterum expellunt; hæc denique contractio, quam systolen vocant, a relaxatione naturali excipitur, cui nomen perisystoles nonnulli indiderunt: corde verum relaxato, iterum sanguinis iterum recluditur, sanguis in ejus caveis iterum ruit, diastole rursus supervenit, succedit systole, cor rursus relaxatur; & sic porro per vitæ totius decursum.

59. Ex quatuor caveis, auriculæ duo simul sanguine dilatantur, simul, systoli suâ sanguinem expellunt; ac simili modo ventriculi ambo diastolen & systolen synchronas habent; sed, auriculis se astringentibus, ventriculi dilatantur, a sanguine nempe ex illis expresso, & dum ventriculi contracti sanguinem in arterias urgent, auriculæ in diastolen veniunt. Hanc legem, vivorum animalium sectionibus stabilitam, & ob cordis fabricam ferè necessariam, negavere nonnulli hujus seculi celebres auctores, Lancisius (e) imprimis & Nichols (f). At eorum sententias, diversas equidem, sed ambo ingenii magis quam veritatis progenies, clare refutat (g) HAL-
LERUS, immortalis nostri HARVÆI strenuus vindex.

60. Cor, dum ventriculi contrahuntur fit brevius,
ejus-

(e) LANC. De Corde prop. 59, 60, 61.

(f) Compend. Anat. p. 27.

(g) Elem. Phys. T. I. p. 418.

ejusque apex, antrorsum versus basin recurvata, quasi erigitur, & costam quintam vel sextam feriens, pulsum efficit, cujus duratione, tempus systoles, remissione vero, tempus perisystoles & diastoles (*b*) mensuramus.

61. Expositis jam (58, 59, 60.) cordis viventis & agentis phænomenis, quænam sit ejus actionis causa videamus. Conjecturas varias, quæ de hac re olim prævaluere, omittendas judico, quum nunc ab omnibus fere rejiciantur; & quia stimuli mentales numquam nisi casu cor afficiunt, ejus stimulum naturalem inter mechanicos vel chemicos solummodo quærere debemus. Nihil autem hujusmodi nisi a sanguine allatum cordi applicatur. Cordis igitur stimulus naturalis in hoc liquore continetur. Hoc suadent, ratio, phænomena, experimenta.

62. Scilicet auriculæ ambo simul sanguine repletæ, stimulum simul accipiunt, adeoque simul ejus vi in contractionem urgentur; his autem contractis, sanguis tum ex eorum caveis, tum ex venis, in ventriculos laxatos impulsus, stimulum, similiter, illis eodem tempore affert, unde statim sequitur eorum contractio. Quin etiam postquam vires vitæ languere incipiunt, & mors proximè abest, cordis cavæ, quæ sanguinem ultimè accipiunt, ultimæ quoque contractionibus agitantur; auricula enim & ventriculus sinistri primò quiescunt (*i*), tunc ventri-

cu-

(*b*) Hinc oritur discrimen inter pulsum celerem & frequentem quod primus notavit Galenus (De Differ. Pulsuum L. I. c. 7.), & plures inter recentiores describere. Quamvis raro hi duo pulsus disjuncti observantur, nonnumquam certe huic sine illo invenimus.

(*i*) HARV. de generat. p. 39. HAL L. Mem. 2. sur les part. sen. &c. Ex. 47 & seq.

culus dexter, & omnium novissima auricula dextra, quæ per horas duo, quinque, sex, vel etiam septem, post ventriculi quietem, (k) se contrahere pergit, unde, GALENO (l) & HARVEIO (m) *ultimum moriens* appellatur. Quod si invertendo sanguinis iter, facias ut caveas sinistras cordis ultimè adeat, tunc caveæ hæ postremo quoque (n) contrahuntur.

63. In sanguine igitur hæret causa quæ cor in motum ciet, quod ita se habere suspicavit HARVEIUS, & post eum alii (o) clari viri; sed HALLERUS certè primus omnium rem apertè proposuit, & ad experimentorum examen revocavit, quo inventionis palmam, vel saltem omnium medicinæ cultorum laudes optimas meruit.

64. Cujusnam sit generis stimulus ille qui a sanguine cordi advehitur jam restat inquirendum. HALLERUS his omnibus enumeratis (p), qui in experimentis suis cor

(k) WEPFER de Cicut. Aquat. p. 304. LEWENHOECK Phil. Trans. No. 319. HALL. loc. cit.

(l) Admin. Anat. XV. No. 15.

(m) Exercitat. I.

(n) Ut in experimentis pulcherrimis HALLERI. Mem. sur le mouv. du sang, p. 168. & seq. Sec. Mem. sur les part. sens. &c. Exp. 515. & seq.

(o) Præter illos qui ab HALLERO citantur, numerari meretur Fredericus HOFFMAN cujus verba liceat hîc exscribere. „Dum autem sub hisce symptomatibus, ab exteriorum strîcturæ, sanguis ad interiora, & vasa majora, pulmones, caput, & cor urgetur, ipsæ sua copia cordis musculum ad vehementiorem pulsus, celerior remque systolen exstimulat.” HOFFM. de recto usu Cort. Chin. in febr. Intermitt. § 19.

(p) El. Phys. T. I. p. 469.

cordis actionem excitavere, tacet omnino de illo, qui ei in fanitate naturalis est; Clarus vero WHYTT, qui hanc rem fusè tractat, conatur ostendere sanguinem cor stimulare, distensione (*q*), calore (*r*), oscillationibus ex fermentatione oriundis (*s*), acrimoniâ denique salinâ, oleosâ & spirituosâ (*t*); at multæ rationes impediunt, quominus tantam stimulorum diversitatem, in sanguine, morbis incorrupto, recipiamus.

65. Primò igitur sanguinis & ipsius cordis idem est calor, nempe circiter gr. 98. in Scal. Fahrenheit, satis autem ex Physicis constat, dua corpora æque calefacta, quum in contactum veniunt, nullum novum caloris gradum sibi invicem impertire, nec sensum caloris in corpore sentiente oriri, ex contactu alii, simili caloris gradu fruientis, unde fas est concludere sanguinem suo calore cor neutiquam stimulare, ne vel sensationem excitando (*u*). Nil contra nos faciunt HARVEI (*v*), aliorumque (*w*) experimenta, ubi aqua calida motum cordis pulli auxit, vel restituit (*x*), in his enim cordi calor novus conciliatus est, quod quandocunque fit, etiam in vivo homine, semper similem habet effectum; at stimulus iste, omnimodo fortuitus, a sanguine minimè ad-

ve.

(*q*) Eff. on Vit. Mot. p. 52, 53.

(*r*) Ibidem p. 59. & seq.

(*s*) p. 62.

(*t*) p. 54.

(*u*) Nempe secundum Cl. viri theoriam (5).

(*v*) De motu cordis cap. 17. De generat. anim. exerc. 17.

(*w*) HALL. de ovo incubato.

(*x*) WHYTT. l. c. p. 62.

vehitur, quum cor ipsum, eodem tempore, ac sanguis calefcit.

66. De sanguinis fermentatione (64) nihil certi novimus. Verum est, ex hac causâ tantummodo originem liquoris a chylo tam diversi intelligere possumus, nec fermentatio sine motu existere queat; haud tamen idcirco sequitur, talem esse motum internam sanguinis, ut idoneum sit ad cor stimulandum, certè enim est admodum debilis, quum nec sensibus pateat, nec chyli copia exigua, qui nempe gutattim fere in sanguinem advehitur, motum, nisi levissimum, magnæ sanguinis undæ communicare possit.

67. Quod ad acrimoniæ varia genera (64), ex oleis, alcohole, vel salibus in sanguine, oriunda pertinet; alcohol certè in sanguinis massâ nemo (y), unquam invenit, & olea etiam sanguinis, multis reverâ decantata, prorsus ambigua videntur: pars ejus rubra oleo perquam similis, cum aquâ purâ miscelam integram subit, a qua olea omnino abhorrent: Et denique olea essentialia (z), quæ sola ferè stimulo chemico potiuntur, a sanguine nostro proculdubio absunt. Non equidem inficias ibo, liquores spirituosos (ut vocari solent) vel aromata oleo essentiali abundantia, si his aliquantum liberius utamur, pulsum accelerare; pulsum tamen prius accelerant quam in sanguinem provenire possunt, si eum unquam immutata adeant, & denuo sunt tantum stimuli cordis (42) fortuiti, ut modo de calore pronunciavimus (65).

68.

(y) „ Chylus in vasa lactea forbetur, non Alcohol ” HALL. EL. P. T. IV. p. ult.

(z) WHYTT. l. c. p. 55.

68. De salinâ sanguinis acrimoniâ (64) magis hæsito. Sales, sine dubio, in eo soluti adsunt, ut experimentis manifestatur, copiâ autem tam parvâ, ut vix alius quivis liquor linguam sapore magis blando afficiat, & oculis infusus lacrumarum fluxum (*a*) haud excitat; nec credibile videtur, hanc acrimoniam vi stimulante specificâ in cor (*b*) agere, quum stimuli specifici plerique gustum evidenter afficiunt, vel virtutibus chemicis insignibus gaudent. Quod si cor a sanguinis salinâ acrimoniâ excituletur, cur fit, quæso, ut numquam in sanitate contrahatur, nisi post integram distensionem? Hæc certe non necessaria est, ut stimulus chemicus agat, quin & in morbis hisce in quibus acrimonia sanguinis magnopere augetur, cor se prius contrahat, quam ab ejus influxu impleatur, ut pulsus frequentia, cum tenuitate juncta ostendit.

69. Quare probabile videtur, non multum, ne vel salinæ sanguinis acrimoniæ,tribuendum esse, stimulum vero cordis naturalem nil aliud esse, nisi mechanicum illum distensionis, omnesque alios pulsum nonnumquam augentes, pro morboſis sæpe, pro fortuitis semper habendos esse.

70. De nullâ re magis dissentiunt Physiologi, quam num sanguinis circuitus, vi cordis propellente unicè perficiatur, an potius huic auxilium præbeat, vasorum actio muscularis. Varia argumenta depromunt utriusque sententiæ fautores, quorum omnia hîc repetere meas limites

(*a*) WHYTT. l. c. p. 55.

(*b*) Ibid. p. 56, 57, 58, 59.

tes nullum superaret, lectorem igitur ad eorum scripta (c) relego, paucis verbis interim proferens id, quod mihi in hac re verius apparet.

71. Arteriæ cordi propiores, sanguinis flumine dilatæ, se iterum restituunt, superveniente cordis diastole, hæc autem contractio, nec cordis vim auxiliare, nec a naturâ musculari pendere putamus, sed cordis solummodo vires, in iis dilatandis perditas, compensare, quomodo tantundem contrahantur, quantum prius dilatæ (e) fuere, & in experimentis HALLERI (quavis ille earum fibras musculosas (f) recipiat) minime, ex stimulorum mechanicorum (15) applicatione, se contraxerunt, ne vel chemicorum forum applicatione, diverso modo in animalibus viventibus, quam altero post mortem die, (g) contractæ fuere.

72. Sed aliter certe de minimis vasis sanguiferis censendum judico, quomodo plura Phænomena iis vim irritabilem inesse suadent, & credo demonstrari potest, velocitatem, sanguini a corde impreffam, auctam esse, dum illa perfluit.

73. Vim irritabilem istorum vasorum probare satis clarè videntur effectus medicamentorum rubefacientium (h), pudoris (24.) &c. nec non stimulorum specificorum in
gland.

(c) HALL. El. Phys. T. I. Lib. IV. Sect. IV. §. 32, 33, 39. T. II. Lib. VI. Sect. I. §. 37, 38, 39. WHYTT Phys. Essays. On the motion of the blood in the very small vessels.

(e) HALL. El. Ph. T. II. p. 209.

(f) l. c. T. I. p. 63.

(g) Ibid. p. 71.

(h) WHYTT. Physiol. Ess. p. 42. & seq.

glandulas actio, de qua postea (89.) dicetur. Si autem irritabili vel musculosâ naturâ potiantur, argumentum non leve etiam hinc suppeditatur pro eorum sententiâ, qui sanguinem a vasis ipsis promoveri docent.

74. Fateor equidem non ita multum ponderis habere calculos illos, quibus ostendere conantur Jatro-mathematici, totam vim propellentem cordis impensam esse, antequam sanguis in vasa minima (i) perveniat: incertissima enim sunt data omnia, quibus hujusmodi calculi superstruuntur, & experimentis procul dubio monstratur, cordis vim, quamvis multo imminutam, ad arterias, vel etiam venas minimas reverâ pertinere: nam, in hisce vasculis, sanguinem ex omni cordis pulsu acceleratum, varii auctores (k) observaverunt.

75. Velocitatem igitur sanguinis, musculosâ vasorum minimorum vi (72.) augi, non huic integrè deberi, diximus, quod, ni fallor extra dubitationem ponunt experimenta sequentia, admodum ingeniosa, a JOH. HUNTERO instituta.

Exp. I. sanguinis fluxu in ovis viventis mesenterium intercluso, ejus vasa ab omni sanguine superstite lavavit: tunc, siphone in arteriâ meseraicâ immisso, liquorem quendam, vi quæ cordis potestatem (l) exuperavit,
in

(i) WHYTT. l. c.

(k) LEUENH. Opera omn. T. III. p. 114. BAKER. Microscope made easy. p. 121. HALES. Hæmast, p. 69.

(l) Modo sequente novit vim, quâ utebatur, cordis vires exuperare. Multum in arte injiciendi versatus, liquorem in hisce experimentis, impetu sibi usitato, in arteriam adegit. Ejusmodi vero impetu, cicatricem umbilicalem rumpere queat, tres quatuor, vel etiam quinque post partum dies, quum cordis vires ad hunc effectum minimè sufficiant.

in eam iniecit, qui per omnes ramos arteriosas devectus, pleno rivo, ex venulis sectis, redux fluebat.

Exp. II. Ovem nunc interficiens, liquorem iterum in eandem arteriam impulit, simili vi propellente usus. Liquor sane ad venas pervenit, at jam ex eis lentissime stillabat, qui antea fluente emanaverat continuo.

76. Argumentum ex gangrænâ sumtum, osseam articularum degenerationem comitante, cui ab HALLERO respondetur (*m*), multaque alia dubia omitto, utpote quæ ad hanc rem stabiliendam minimè necessaria videntur, post experimenta jam narrata. Si autem verum sit, vasa minora, contractione musculosâ, (*n*) sanguinis iter expedire, eorum stimulus naturalis idem est ac cordis ipsius (69.), distensio nempe quam sanguis producit.

77. A toto systemate venoso abesse naturam musculosam judico, exceptis istis Venæ Cavæ partibus, quæ tum supra, tum infra cor, ab eo non longe distant; hæ nempe, ex stimulis vel chemicis, vel etiam mechanicis adhibitis, contractionem subeunt, uec non a sanguinis influxu, pulsu (*o*) agitantur, & ab eo simili modo ac arteriæ minimæ (76) afficiuntur.

78. Ad voluntatem referre actionem musculorum RESPIRATIONI inservientium, nullus dubito, quum eam augere, protrahere, minuere, vel impedire, ad libitum possimus. Somni tempore profecto contrahuntur; sed ar-

(*m*) T. I. p. 441. 442.

(*n*) Certe Ill. ipse HALLERUS eorum actionem muscularem in nonnullis sui operis locis non sine hæsitatione negat, phænomena contra propriam sententiam facientia candidè narrans: El. Ph. T. II. p. 214, 215.

(*o*) HALL. libro cit. T. I. p. 398.

artus ipsos in fomno movemus; imo omnes fere motus voluntarios peragimus nonnumquam: Nifus voluntatis, musculos respirationis in contractionem urgentes, non semper a nobis percipiuntur, vel potius in mente citissimè orti, transeunt, nec memoriâ (*p*) retinentur; sed quia in ambulatione haud magis percipiuntur, non ideo motus artuum non producant; quod si mentis aciem ad respirationem adtentè dirigamus, semper luculenter apparet, nos eam volere: Denique verum est nos ad respirationem quasi coactos esse, post longam expirationem, sed in hujusmodi casu, voluntas ipsa cogitur, si ita cum HALLERO (*q*) loqui fas sit; scimus scilicet vitam perditam ire, si non inspiremus, quare voluntatem ad hunc finem dirigamus; certe non desunt exempla hominum qui respirationem integrè impediendo, vitam miseram (*r*) finivere.

79. Sensatio ingrata hic fortasse locum habet, sed quod stimuli vicibus fungatur (*s*) non facile credam; ejus causâ respirare tantummodo volumus; stimulus ipse, musculos in actionem ciens, a voluntate provenit. Nec sensationem hanc, vel aëris appetitionem (*t*), nisi post impeditam aliquamdiu respirationem, vel quando infans recens natus primo inspirat, recipiendam esse judicamus, quum nihil hujusmodi, in usitato respirationis exerci-

(*p*) HALL. T. IV. p. 530.

(*q*) l. c. T. IV. p. 524.

(*r*) GALEN. De motu musc. L. II. c. 6. PLIN. Hist. Nat. Lib. X. c. 21.

(*s*) WHYT. Ess. on Vit. Mot. p. 196. & seq.

(*t*) Id, ibidem p. 250.

citio, attentione etiam summâ mentis adhibitâ (u), sentitur.

80. Aquam vel alios quoscunque liquores, pro musculorum glottidis stimulis specificis, supra memoravimus (35), qua ratione a Naturâ præcavetur, ne quid pulmonibus nocivum eas intraret. Hinc vulgo docetur nullam aquam pulmones ingredi, quando vita submersione adimitur; Et quia nonnumquam aqua in submersorum pulmonibus invenitur, argumentis hinc collectis respondent, aquam, nonnisi aliquamdiu post mortem in pulmones descendisse, perditâ jam musculorum glottidis vi (v) vitali.

81. Hæc admodum speciosa, experimentis, quæ nuperrimè feci, haud confirmantur, ex quibus fati liquet aquam sub articulo mortis pulmones reverâ intrare, quando animalia submerguntur, non secus ac si musculi glottidis ab aquæ vi stimulatrice non afficiantur, ubi stimulus ad respirandum magnopere augetur. Experimenta ista non abs re erit hîc loci enarrare.

Exp. I. Cuniculum, in aquâ atramento coloratâ mersi, & postquam per aliquot temporis momenta in eâ retinuissem, manifestim bis vel ter quasi anhelare, manu quo illum tenebam, sentivi. Cito post ex aquâeducti thoracem dissecai, pulmonesque nigro atramenti colore imbutas miratus sum, quin & aquæ nigrescentis guttulæ ex Asperâ Arteriâ stillabant.

Exp. II. Alius Cuniculus in aquâ (w) flavi coloris sub-

(u) HALL. l. c. p. 530.

(v) WHYTT. l. c. p. 232. 233.

(w) Quæ Gambogio tincta fuit.

submersus, similia omnino phænomena exhibuit, & in hoc casu, cordis motus nondum desiisset, quando thoracem (x) aperui.

82. De GLANDULIS, earumque ductibus nunc dicendum est. Nostri argumenti minimè interest, quænam sit intima glandularum fabrica, vel quo pacto, liquores tam varii, tam singulares, omnes ex eodem fonte (sanguine nempe) hauriuntur. Nos pro certo habemus, nihil unquam produci novis proprietatibus præditum, nisi chemicâ mutatione; quod, si verum sit, pars glandularum propria nil aliud est nisi locus idoneus quo detineatur sanguis, vel ejus pars aliqua, donec talem mutationem subeat.

83. Sed longè major pars glandularum vasis constat huic parti propriæ subministrantibus, sanguiferis, quibus sanguis advehitur, & excretoriis, quæ liquorum novum abducunt. Illa vero jam (72. ad 76.) consideravimus.

84. Vasa excretoria, in diversis glandulis, diversimode se habent. In universum plures radiculæ minimæ, sensim coeuntes, tandem in unum canalem satis conspicuum, propè glandulæ exitum, conveniunt, qui fluidum secretum, in corporis superficiem, vel in caveam quandam internam, vel denuo in receptaculum huic usui dicatum, effundit.

85. Ex experimentis suis in ductus excretorios, omnino fere negat HALLERUS iis vim aliquam irritabi-

(x) Horumce experimentorum testes habeo amicum meum devotissimum J. C. Smyth. M.D., & D. Hewson, Cl. Hunteri in Præl. anatom. socium.

bilem (y) inesse; sed in illos non adeo numerosa videntur quæ fecit Ill. vir, ac in cæteras corporis partes, & alia experimenta, quæ jam ingenuè recensebo, me non sinunt ejus opinioni, alioquin tam gravis in Physiologiæ auctoritatis, accedere.

Exp. I. Dissectis abdominis parietibus in cuniculo vegeto, intestina ita femovi, ut in conspectum veniat ureter. Eum tunc variis stimulis mechanicis irritavi scalpello punxi, digito compressi, forcipe vellicavi, semper vero hoc eventu, ut tubus se evidentissimè contraheret, modo aliquantum diverso, diametro nempe nunc per totam longitudinem minuto, nunc stricturis hîc & illîc apparentibus, inter quas sacculi quasi intercepti fuere.

Exp. II. Stimulos eosdem, & in eodem animali, ductui cystico, & bilis communi, adhibui, nec tamen secuta est contractio oculis conspicua. Vesica fellea post hâc scalpello pertusa, se sensim contraxit, bile ex foramine stillante; contractionem vero istam non elasticam sed muscularem fuisse hinc suspico, quod quando vitæ cuniculum fere omnino deseruisset, vesicula majorem diametrum (z) recuperaverat. At si vi musculari pollea vesica fellea, non est cur dubitemus ductum cysticum ejus quasi processum, vel & alios ductus biliarios, similem naturam habere.

Exp. III. In alio cuniculo, jam, ob experimenta nonnulla in ejus vasa sanguifera instituta, languescere incipien-

(y) Mem. sur les part. sens. & irritab. T. I. p. 58.

(z) Sic mihi, sic HEWSONO visum est; qui me in experimentis quinque primis adjuvit.

piente, ureteres ambo eodem modo tractavi, qui in hoc casu nullam monstrare irritabilitatem.

Exp. IV. Terti denique cuniculi ureteres, quando stimulos eosdem (Exper. I.) adhibui, sese evidenter contraxere.

Exp. V. In hoc cuniculo vesica fellea simile ac in animali primo naturæ suæ musculosæ specimen exhibuit.

Exp. VI. Abdomen canis secavi, & semotis intestinis, stimulos varios, tum mechanicos, tum chemicos applicavi ejus ureteribus. Horum nonnulli contractionem excitavere, obscuram equidem, sed mihi & amico, cum quo experimentum feci, conspicuam.

86. His liceat addere experimenta sequentia, ad eandem rem pertinentia, quæ fecere Cl. MONRO Filius & JOH. HUNTERUS, viri naturam animale[m] investigare optimè callentes.

MONRO, ut a collega sua WHYTT in tentaminibus Physiologicis (a) citatur, & nos ex eo in prælectionibus anatomicis audivimus, contractionem ureteris porculi strangulati manifestam vidit a scalpelli puncturâ, quin & quum eum compressisset digito, se vermîs instar contorsit.

HUNTERUS vero me certiores fecit, se, ope stimulorum, in equo moribundo motum quasi peristalticum tum ureterum, tum vasorum Deferentium excitasse.

87. Si autem hæc omnia (85, 86.) candidè ponderemus, & denique consideremus, quod, si in hisce experimentis, aliquam monstraverint vim irritabilem canales isti de quibus differimus, credibile esse eos multo magis

(a) p. 144.

gis a stimulis suis naturalibus affici, qui, illæsa sanitate eorum superficiei (*b*) internæ applicantur, nonne ex his, inquam, sequitur, sine dubio fere superstitite, eos naturâ musculosâ pollere, qua liquores in glandulis paratos promovent.

88. Stimuli ductuûm naturales in propriis glandularum liquoribus quærendi sunt. Hi vero quamvis indolîs prorsus diversæ, paucis tantum (*c*) exceptis, adeo mites sunt ut, in universum, distensionem pro stimulo qui ductibus naturalis est habere, a veritate haud absorbum videtur.

89. Stimuli illi fortuiti, qui secretionûm copiam tantopere nonnumquam adaugent, ut medicamenta evacuantia, pathemata quædam mentis, (24.) &c. in eorum vasa sanguifera præsertim agere videntur (73). Nam nisi ista vasa sanguinis copiam insolitam glandulis invehant, secretio augeri non potest; & liquores in ejusmodi casibus secreti, crudi admodum, ut qui sæpe nil aliud sint nisi sanguinis serum, vel etiam sanguis ipse, probant eundem sanguinem, vel partem ejus serosam, motu citato in glandulas advectam, eas citissime perfluxisse.

90. Variæ clarorum virorum sententiæ de modo quo sanguis in PENIS cavernulas derivatur, ita ut ejus erectionem producat, multum inter se dissidentes, tam subtilibus, a diversis suis auctoribus, stabiliuntur argumentis, ut inter illas omnino dubius hæreo. Sed quamvis disputatur de musculis, quibus effectus hicce tribuendus est, ne-

(*b*) Cordis interna superficies multo irritabilior est exteriori. Vid.

HALL. acta GÖTTING. Tom. I. p. WHYTT. l. c. p. 157.

(*c*) Bilis cystica, urina fortasse, &c.

neminem esse credo, qui negat eum a vi musculari (*d*) pendere. Hujus vero stimulus naturalis est appetitus (23) venereus.

91. Ad semen ejiciendum plures stimuli concurrunt. Nonnumquam solo appetitu venereo in urethram adfertur, alias solâ frictione. Sed naturaliter ambo hi simul agunt. Ubi vero in urethram pervenit, sensationem gratam ibi excitat, quæ, ut credimus, musculis ejaculatoribus pro stimulo est, nam semen ipsum stimulum specificum esse partium (*e*) Virilium non consentaneum videtur ejus naturæ blandæ; & , ni fallor, alius quicunque liquor, tunc temporis, urethræ tensæ & exquisitè sentienti applicatus similem produceret effectum.

92. Fœtus in UTERO contentus, maturitatem & magnitudinem justam adeptus, uterum distendit, distrahit, dolorem creat tenesmo haud absimilem, quo mens fere eodem modo ac tenesmo afficitur, ita ut a voluntate musculi abdominis & diaphragma in contractionem urgentur, qui uterum quasi in prælo comprimentes, fœtûs expulsionem pomonent.

93. Sed ut in alvi dejectione, ita in partu, actio eorum non est sola causa expultrix. Quamvis [potestas illa mirabilis sese paulatim contrahendi, qua post partum uterus pristinam molem recuperat, huic visceri propria videatur, nec ad naturam musculosam referenda, non tamen vi verè musculari destituitur. Ejus fibræ

(*d*) „Musculi Erectores penis, veri illi, quicunque sunt”.
HALLER El. Phys. T. IV. p. 516.

(*e*) WHYTT. Vitat. Motions. p. 58, 119.

fibræ musculares non adeo clarè monstrari possunt, possunt tamen monstrari (*f*), & uterus fecundus in aqua bulliente digestus, a carnis musculosæ specie minime (*g*) abludit. Ex HALLERI experimentis patet uterum etiam virgineum stimulis (*b*) obedire; Casum habet HARVEJUS in quo uterus ex corpore prolapsus, fœtum parvulum solâ suâ vi (*i*) expulit: Ill. G. HUNTERUS narrat se in fele gravidâ, cujus abdomen secuisset, plane observasse cornua, ubi fœtus jaciebant, motu peristaltico agitata (*k*): ex his omnibus verò concludere licet, partum, non minimâ ex parte uteri vi musculosâ fieri, quem fœtus distensione (*l*) irritat.

94. Investigato jam stimulorum imperio in insigniores corporis sani functiones, DISTENSIONIS stimulus mechanicus, si non unicus, præcipuus saltem videtur esse, qui in eo dominatur; nec alium forsam magis idoneum invenies, qui motus, constantes, lenes, æquabiles, quales ad sanitatem perfectam requiruntur, cieret.

95. Quod si progredieremur inquirendo in stimulorum vires morbias, vel medicabiles, has præsertim inche-

(*f*) HALL. pr. Lin. Ph. DCCCCIV, DCCCCV.

(*g*) Hujus rei specimen exhibet MONRO in Præl. Anat.

(*b*) Mém. sur les Part. sens. & irrit.

(*i*) De generat. in capitulo de partu p. 521. Confer. HALL. Pr. L. DCCCCXLV.

(*k*) In Prælect. suis Anat.

(*l*) „ Uterus a fœtus mole distentus, ——— atque ob id ad expulsiōem excitatus”. Fabr. ab Aquapend. De formatione fœt. c. 9.

chemicorum classe, illas plerasque inter chemicos vel mentales inveniremus. Sed hæc argumenti nostri capita, gravitate equidem & utilitate notabilia, impræsentiarium posthabeamus oportet, ne limites præstitutas transeamus.

Sed huic tentamine priusquam finem faciam, ne vobis displiceat, Viri Celeberrimi, coram quos nunc meæ in Medicina scientiæ iudicium subeo, si, etiam in hac regione peregrina, grato animo agnoscam quantum debeo præceptoribus, quos in patriâ sortitus sum, optimis; præsertim autem institutioni & consiliis GUL. CULLENI & JOH. GREGORY. Hic enim, plerosque hominum ingenii acumine morumque suavitate præcellens, primus mihi artis Apollinaris principia, ad castæ Philosophiæ normam revocata, recludit: CULLENUS vero, qui capacem VERULAMII mentem, ad omnem scientiam elucidandam & promovendam possidere videtur, me, dum in Academia Edinensi studiis incubui, & Prælectiones publicas frequentavi, amicitia & familiarite suâ honoravit.

F I N I S.

